

LES DERINS SACREMINTS

Lès p'tits viladjes d'Ârdène richonenut au pus sovint à dès amias. Dins l' payis d'Érezée, à Clerheid, tot bin compté, i-gn-aveûve qu'one dîjin.ne di maujones èt, au coron, à aviè on kilomète, deûs vîyès cinses.

Li Nès' èt s' feume Jènîye ènn'avin.n' acheté one l'anéye qu'il ont dispindu l' gayole. Li qu'èsteûve bolèdjî à Bastogne, il aveûve tofêr dit qu'i n' dimeurreûve nin todi véla : « Dji n' so nin on-ome dèl vile, savoz mi ! ». Il aveûve trové si p'tit paradis avou on corti èt sès fleûrs - malèrèûs ! - one pitite grègne po-z-î mète sès cwades* di bwès. On-ôte di sès plaijîs : aler al tchèsse avou s' prumî vijin Djan, gârde èmon l' Baron de Colinsart. Cès deûs la ont rademint socené. Èt çà fieut vint' cinq ans asteûre qu'i s' vèyin.n' quausu tos lès djoûs.

Mins dispû saquants mwès, ça n' li aleûve pus fwârt au Nès'. Autoû dèl Tchandeleûse, si feume a co fait v'nu l' docteur. L'ome a yeû bin dès rûses po-z-ariver. Nin sbarant, l'iviêr èsteûve taurdu ç'te anéye là. I djaleûve totes lès néts à mwins vint' èt li djoû di d'avant, il aveûve co tchèyu on d'méy mète di nîve.

Après l'awè bin racawaîtî, li docteur, purdant Jènîye à paurt, li a anonci : « I n'enn'a pus po longtims vosse Nès'. Si dj' sèreûve di vos, dji freûve v'nu mossieû l' curé ! » Èle lî a soné, mins ç' djoû-la, il èsteûve à Nameûr, mon l'èvêque. Èlle a yeû l' novia vicaîre qu'a promètu di v'nu rademint. On còp l' téléphone riclapé , èle s'a d'mandé : « Va-t-i trover ? I n'a jamais v'nu j'qu'à véci ! » Pâr chance, Djan passeûve aaur-la èt i lî dit : « Ni v's-è fioz nin ! Djè l'îrè qwêre ! »

Il aveûve bin dès còps stî au viladje qui lès vôyes èt lès pîssintes ni s' vèyin.n' nin pad'zo l' nîve. Adon, su on rin d' tims, vola noste ome qui r'vint avou l' vicaîre.

« Bondjoû Nès' »

Tot sbaré, cit'ci lî rèspond :

« Â ! Bondjoû mossieû l' curé ! À vos veûy, c'èst qu' ça m' va vraîmint mau, d'abôrd ! ».

I n' pinseûve nin co tant « ossî au mantche ».

Èt l' djon.ne curé, li, a sayî d' lî fé comprinde qui 'nn'estans pus au tims d'ofri l' sâcrèmint pace qu'on-z-è-st-au coron d' sès rôyes ; qui c'è-st-on « sine di nosse Sègneûr qu'è-st-avou nos dins nos mwaîs djoûs »... èt dès dji n' ti saî nin trop qwè !

Li Nès', li, i li r'waîteûve one miète di truviès tot pinsant qu'i 'nn' î faut bramint d' pus po crwêre à tot ça. Mins, i l'a léyî fé.

Èt vola nosse vicaîre qu'attaque sès pâters, en latin bin sûr. Tot lès d' djant, i lî fait one masse di sines di crwès avou l' sinte ôle... su s' front, dins sès mwins, jusqu'a-z-ècrauchî sès pîds.

Tot d'on còp, vola nosse Nès' qui tire one di sès tièsses qui tot l' monde pinse qu'il è va po d' bon. Mins, c'èst mau s' vinte qu'il a. Èt i s' rastint on bon momint.

Li dérin 'Àmen' ! n'èst nin co prononcî qu'on-z-ètind r'dougnî one di cès vèsses.
Autoû d' li, li curé, Jènîye et Djan dimeurenut tot paf !

Do côp, li malade si sint mia èt avou on sorîre jin.né :

- « Dji vos d'mande èscuse, savoz, mossieû l' curé ! Mins ça m' fait branmint pus d' bin qu' tos vos-ôrémus' ! »

Si l' Nès' èst mwârt dispû longtîmps asteûre – c'èsteûve do tîmps d' l'iviêr di 1954 – dins l' pays véla, lès vîyès djins racontenut co todi l' pasquéye qu'a conu on djon.ne vicaîre po l' prumî côp qu'i lî faleûve d'ner lès dérin sâcrémints.

Bernard Van Vynckt

* une corde de bois = 2 stères.